

Trefniadau ar gyfer Comisiynu Gwasanaethau – Cyngor Sir Ceredigion

Blwyddyn archwilio: 2023-24

Dyddiad cyhoeddi: Awst 2025

Cyfeirnod y ddogfen: 5008A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg. This document is also available in English.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad hwn	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau.
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronns yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfwrdd ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Archwilio Mewnol – Meddalwedd Rheoli Archwilio – Cyfreithiol a Llywodraethu
 - Safleoedd Gwastraff y Cartref – Gwasanaethau Priffyrdd ac Amgylcheddol
 - Gofal Cymdeithasol – System Rheoli Achosion – Gwasanaethau Gydol Oes

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn yn ystod mis Tachwedd a mis Rhagfyr 2024.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom **fod gan y Cyngor rai rhannau allweddol o drefniadau comisiynu corfforaethol yn eu lle i'w helpu i sicrhau gwerth am arian, ond nad ydynt wastad yn cael eu rhoi ar waith yn ymarferol. Mae'r Cyngor yn gweithio i ymdrin â hyn.** Rydym yn nodi isod pam y daethom i'r casgliad hwn.
- 16 Er ei bod yn glir i'r Cyngor pa wasanaethau y mae'n bwriadu eu comisiynu a pham, nid oes ganddo ddull systematig o arfarnu opsiynau ar hyn o bryd.
- 17 Mae'r Cyngor yn diffinio'r gwasanaethau y mae'n bwriadu eu comisiynu yn glir. Mae Rheolau Gweithdrefn Contractau'r Cyngor yn datgan y dylid ystyried amcanion a gofynion yr ymarfer caffael arfaethedig ar ôl adnabod yr angen i gomisiynu'r gwasanaeth. Mae'r gofyniad diffiniedig am wasanaeth hefyd yn gysylltiedig â 'pham' oedd gwasanaeth a gomisiynwyd yn ofynnol gan y Cyngor. Er enghraifft, roedd y cynllun busnes Archwilio Mewnol yn dangos y cysylltiad rhwng y gofyniad am system rheoli archwilio newydd a gallu'r gwasanaeth i gyflawni ei gynllun archwilio mewnol.
- 18 Nid yw trefniadau cyfredol y Cyngor yn ysgogi rheolwyr contractau'n systematig i ystyried ystod lawn o opsiynau wrth gomisiynu gwasanaethau. Mae'r Cyngor yn gweithio ar dempted 'cyn caffael' a fydd yn rhoi'r cyfle i reolwyr contractau ddogfennu'r opsiynau a ystyriwyd mewn modd cyson. Mae hwn ar ffurf fersiwn ddrafft ar hyn o bryd. Fodd bynnag, fe ganfuom ni enghreifftiau o wasanaethau'n ystyried opsiynau cyn comisiynu. Er enghraifft, mae tîm Gwasanaeth Gwastraff y Cartref yn cynnal adolygiadau bob hyn a hyn o'r gwasanaeth gwastraff i sicrhau bod y gwasanaeth yn dal i gyflawni fel a fwriadwyd. Roedd hyn yn cynnwys arfarnu nifer o opsiynau gweithredu posibl.
- 19 Mae deall yn glir pam fod gwasanaethau'n cael eu comisiynu, yr hyn y maent wedi'u bwriadu i'w gyflawni, a'r gwahanol opsiynau sydd ar gael yn elfennau pwysig o drefniadau i sicrhau gwerth am arian. Os nad yw'r Cyngor yn gyson yn ystyried ystod lawn o opsiynau, ni all fod wedi'i sicrhau ei fod wedi dewis yr opsiwn sydd fwyaf tebygol o ddwyn gwerth am arian.
- 20 Mae'r Cyngor yn cynllunio ei weithgarwch comisiynu dros raddfa amser briodol. Mae'r Cyngor yn ystyried cynllunio hirdymor yn ei ddull comisiynu gan gynnwys goblygiadau hirdymor o ran adnoddau. Mae Panel Rheoli Prosiectau Corfforaethol y Cyngor a'r templed briff prosiect cysylltiedig yn ysgogi rheolwyr contractau i ystyried anghenion hirdymor gwasanaethau wrth fynd â phrosiect neu ymarfer

comisiynu trwy broses y panel. Er enghraifft, roedd fframiau amser y Contract ar gyfer Safleoedd Gwastraff Cartref y Cyngor yn y tymor byr wedi cael eu cysoni i'w gwneud yn bosibl ystyried adolygiad strategol ac opsiynau comisiynu ar draws y tri safle. Cafodd hyn ei gydbwyso yn erbyn graddfeydd amser tymor canolig y Contract, a'i gwnaeth yn bosibl taro cydbwysedd rhwng buddsoddi ac adennill costau yn erbyn cynllunio tymor canolig a hir a gofynion deddfwriaethol newidiol. Wrth gomisiynu'r gwasanaeth, fe sicrhodd y Cyngor hefyd ei fod yn ystyried goblygiadau lleihau carbon a chefnogi'r nodau llesiant cenedlaethol dros y tymor hwy.

- 21 Nid yw'r Cyngor yn mynd ati'n systematig i ystyried sut y bydd gwerth am arian gwasanaethau a gomisiynir yn cael ei asesu a'i fonitro wrth gynllunio gweithgarwch comisiynu. Mae ystyried goblygiadau hirdymor a byrdymor a gwerth am arian penderfyniadau comisiynu'n lleihau'r risg o beidio â chyflawni gwerth am arian dros y tymor hwy.
- 22 Mae'r Cyngor yn meddwl am yr effeithiau ehangach y gallai'r gwasanaethau a gomisiynir ganddo eu cael. Mae gwasanaethau a gomisiynwyd gan y Cyngor yn cael eu cysylltu â blaenoriaethau cenedlaethol a rhanbarthol trwy ei broses cynllunio busnes.
- 23 Ar gyfer prosiectau sy'n mynd trwy'r Panel Rheoli Prosiectau Corfforaethol mae Brif Rheoli Prosiect Corfforaethol y Cyngor yn ei gwneud yn ofynnol i wasanaethau ddogfennu a disgrifio sut y mae prosiectau o gymorth i gyflawni Amcanion Llesiant y Cyngor. Mae hefyd yn ofynnol i wasanaethau nodi sut y bydd ei brosiectau'n integreiddio â chynlluniau a strategaethau presennol i gynyddu i'r eithaf eu cyfraniad at bob un o'r saith Nod Llesiant Cenedlaethol. Fodd bynnag, nid yw'r Panel Rheoli Prosiectau Corfforaethol yn gam gorfodol yn y broses gomisiynu ac felly nid yw pob prosiect yn cael budd o'r trefniadau hyn. Serch hynny, nid oes gan y Cyngor drefniadau i sicrhau bod amcanion llesiant cyrff cyhoeddus eraill yn cael eu hystyried yn systematig fel rhan o brosesau comisiynu.
- 24 Gall ystyried goblygiadau ehangach penderfyniadau comisiynu helpu'r Cyngor i osgoi dyblygu ac adnabod manteision lluosog sy'n sicrhau deilliannau gwell a mwy o werth am arian.
- 25 Mae'r Cyngor yn gweithio gyda'r bobl a'r partneriaid iawn i ddylunio a darparu gwasanaethau a gomisiynir ganddo. Ar gyfer y prosiectau hynny a'r gwasanaethau hynny a gomisiynir sy'n mynd i'r Panel Rheoli Prosiectau Corfforaethol, mae'r Brif Rheoli Prosiect Corfforaethol yn ei gwneud yn ofynnol i reolwyr ddogfennu pwy fydd y gweithgaredd yn effeithio'n uniongyrchol arnynt. Mae 'cynllun cyn caffael' drafft y Cyngor hefyd yn cynnwys adran i reolwyr contractau ystyried a dogfennu rhanddeiliaid gan gynnwys eu rôl, eu dylanwad a'u hymwneud.
- 26 Mae gweithio mewn partneriaeth yn cael ei ystyried gan y Cyngor hefyd i wella gwerth am arian y gwasanaethau a gomisiynir ganddo. Ar gyfer gweithgarwch comisiynu sy'n mynd trwy'r Panel Rheoli Prosiectau Corfforaethol mae'r ddogfennaeth yn ysgogi rheolwyr i ddogfennu ac ystyried a oes 'cyfleoedd i gydweithio i gyflawni'r prosiect ac i ddwyn deilliannau gwell'. Er enghraifft, yn ystod

yr adolygiad diwethaf o'i safleoedd gwastraff cartref, fe gynhaliodd y Cyngor brosiect ar y cyd gyda Chyngor Sir Penfro i ddeall yr opsiwn gorau yn y dyfodol ar gyfer darparu gwasanaethau gwastraff ac ailgylchu.

- 27 Gall gweithio gyda'r bobl a'r partneriaid iawn helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, a bod y gwasanaethau hynny'n cael eu darparu mewn ffordd sy'n cynyddu gwerth am arian i'r eithaf.
- 28 Nid yw'r Cyngor yn mynd ati'n systematig i adolygu effeithiolrwydd ei ddull o gyflawni pob gweithgaredd comisiynu. Mae Strategaeth Caffael a Chomisiynu ddrafft y Cyngor yn nodi'r bwriad i roi hunanwerthusiad ar waith i wirio bod gweithgarwch comisiynu a chaffael yn cyfrannu at ddeilliannau diffiniedig. Ond nid yw'r trefniant hwn yn ei le eto, ac felly nid yw'n bosibl gwneud sylw ar ei effeithiolrwydd.
- 29 Ar gyfer gweithgarwch comisiynu sy'n mynd trwy broses y Panel Rheoli Prosiectau Corfforaethol, cynhelir adolygiad o'r prosiect i fyfyrio ynghylch y modd y cyflawnwyd y gweithgarwch ac adolygu hynny a chanfod gwersi a ddysgwyd. Mae hyn yn cynnwys adolygu'r raddfa amser, y gyllideb, canlyniadau ac effaith. Fodd bynnag, nid yw pob prosiect yn mynd trwy broses y Panel Rheoli Prosiectau Corfforaethol ac felly nid yw gwerth am arian yn cael ei werthuso'n gyson ar gyfer pob prosiect.
- 30 Mae gwerthuso cost ac effeithiolrwydd trefniadau comisiynu'n bwysig i helpu i adnabod meysydd ar gyfer gwella, a rhannu gwersi, ac felly sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

- A1 Er mwyn galluogi'r Cyngor i asesu gwerth am arian gwasanaethau a gomisiynir ac adrodd ar hynny mewn modd cyson, dylai ddatblygu proses gymesur i arfarnu'r opsiynau a fydd yn ategu penderfyniadau ynglŷn â gwasanaethau a gomisiynir. Dylai'r rhesymeg ar gyfer penderfyniadau comisiynu:
- gael ei dogfennu'n llawn;
 - cael ei goleuo gan ystyriaeth i ffactorau byrdymor a hirdymor;
 - cael ei goleuo gan farn y rhai y byddai'r gwasanaeth a gomisiynir yn effeithio arnynt; a
 - bod yn destun asesiad risg gan gynnwys ystyried costau a manteision llawn pob opsiwn.
- A2 Er mwyn helpu'r Cyngor i ddangos a yw gwasanaethau a gomisiynwyd wedi sicrhau gwerth am arian, dylai'r Cyngor:
- gryfhau trefniadau i werthuso gwerth am arian yr holl wasanaethau a gomisiynir, gan gynnwys casglu gwybodaeth am wersi a ddysgwyd; a
 - monitro i ba raddau y mae trefniadau comisiynu wedi cyflawni'r deilliannau bwriadedig.

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu. • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth; ac – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol.
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol; – trefniadau partneriaeth neu ddulliau o gomisiynu o fewn ac ar draws sectorau; – allanoli'r gwasanaeth i ddarparwr arall trwy ymddiriedolaeth neu drefniant arall; a hefyd – contractio'r gwasanaeth trwy broses dendro. • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir. • Mae'r Cyngor yn cynnwys costau rheoli contract o fewn ei asesiad o opsiynau comisiynu. • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision. • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyfredol a hirdymor sy'n debygol o effeithio ar wasanaethau a gomisiynir.

Cwestiynau Lefel 2	Cwestiynau Lefel 3	Meini Prawf
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	- Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham. - Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill.
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	- Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir. - Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	- Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir. - Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: – costau a manteision; a hefyd – cynnydd tuag at gerrig milltir a mesurau tymor byr, canolig a hwy.
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon.
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol.

Cwestiynau Lefel 2	Cwestiynau Lefel 3	Meini Prawf
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol.
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	- Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. - Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig.
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau. - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd.
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu; a - gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau.
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.